

New Public Management ni co administrar efficientamain

La Nova Societad Helvetica dal Grischun lascha orientar

■ (anr) NPM (New Public Management) è in sinonim per diriger – a basa da principis giuridics e criteris economics – il pli efficientamain in'administraziun en favur da la clientella. Quest tema è stà en il center dad ina occurrenza, organisada da la Secziun grischuna da la Nova Societad Helvetica, venderdi saira a Cuira. La presidenta, *Béatrice Rehli-Zeder*, ha pudì beneventar in grond dumber d'interessads ord las pli diversas professiuns e posiziuns.

Introducì a moda competenta

Peter Hablützel, directur da la Uffizi federal da personal, Berna, è parti da la situaziun dada cun novas sfidas e respostas necessarias. Quintessenza: In problem schlià porta pil solit gia in nov. NPM munta ina via per vegnir a frida cun quai. El sa basa sin il dretg, intenda l'effizienz economica

ed ha sco final in'administraziun dirigida cun success e progress. Enstagl da reglas han finamiras prioritad. Da las resursas umanas sorta dad in process in product sco resultat concret cun inditgar custs e niz. Quai succeda cun finamira, tras strategias, sur acziun e sa mussa tant en midadas structuralas (reglas) sco culturalas (senn). Premissa: Mintga organisaziun sto emperder e s'adattar permanentamain.

Per *Paul Richli*, professor da dretg public a l'Universitad da Basilea, è NPM ina vaira sfida. Sco basa vala generalmain l'incumbensa dada. I regia perquai savens la tendenza da remplazzar il dretg tras l'effizienz. Quai è privlus. Ins po era gudagnar cun quai bliers daners. NPM ha dentant cunfins. Sper il dretg vala era l'effizienz. Uschia po questa nova disciplina esser in instru-

ment per guidar bain l'economia.

Tenor *Claudio Riesen*, directur dalla Chanzlia chantunala, è las premissas per introducir e miglierar cun NPM l'administraziun dal Grischun zunt favuravlas. El enumerescha insaquants projects realisads en quest senn che han fatg l'administraziun numnada pli dinamica e flexibla. Quai vala sin ils champs dal dretg personal, da la salarizaziun, da models da lavur e tar il tegnairchasa finanziel dal Chantun. Ils dretgs politics e la libertad dal singul na dastgan dentant betg vegnir a la curta. Giavischada è dapli trasparenza e controlla. NPM ha d'avair l'unica mira da servir per diriger meglier il stadi.

Precisà insaquants aspects generals

En in lung discurs al podi, moderà da *Patrick Vogt*, directur da Radio Grischa, han ils referents anc precisà insaquants constataziuns fatgas. NPM vala generalmain sco ina buna basa e directiva. Per il solit è las spetgas dentant zunt grondas. Ellas han la tendenza da sminuir l'influenza dal Parlament e Regenza e rinforzar quella dall'administraziun e reducir – tras raziunalisar – ils servetschs publics. Quai tut sa laschia savens realisar era be cun la sauna raschun, sa dumandond tge che saja il meglier per tgi e cun quants custs. NPM sa drizza per il pli tenor reglas da l'economia privata. Talas sajan pussaivlas d'applitgar cun betg main effizienz era dal stadi. Indispensabel è che mintga pertutgà acceptia cun la segirtad d'occupaziun era la promtezia da mobilitad persunala.



Er las administraziuns ston daventar ozildi pli efficientas e quai en emprima lingia en favur da la clientella.